

Deklaracija kojom se Predstavnički dom Parlamenta Federacije Bosne i Hercegovine izričito protivi odlaganju radioaktivnog otpada iz Hrvatske u blizinu granice s Bosnom i Hercegovinom, na Trgovskoj gori, odobrena je jednoglasno na današnjoj sjednici ovog doma u Sarajevu.

Osnovna poruka je da državni nivo treba aktivno da se uključi u problem, usprotivi se odlaganju opasnog materijala radi zaštite zdravlja građana i kvaliteta životne sredine, koji bi mogli biti ugroženi bude li radioaktivni otpad deponovan uz granicu BiH. Deklaracija je, u biti, "apel za zaštitu sadašnjih i budućih generacija".

Pošto je sličan akt izglasala i Republika Srpska, na sjednici je odobren zaključak u formi poziva Parlamentarnoj skupštini BiH da što prije poduzme aktivnosti na realizaciji entitetskih deklaracija.

Na takvom zaključku su inisitirali poslanici Socijaldemokratske partije BiH. Oni su tokom cijele ove tačke dnevnog reda isticali da je riječ o problemu što je po samoj prirodi državno, odnosno vanjsko pitanje koje treba rješavati s drugom državom.

Predlagač Deklaracije je poslanik Kasim Mulalić iz Bužima, gradića čiji se stanovnici, kao i u drugim obližnjim mjestima Bosanske krajine, jednako kao u prekograničnim oblastima, boje, zasad nedefinirane opasnosti. Naročito strahuju za vodotokove kojima je njihovo područje obilno obdareno osim drugim prirodnim blagodetima.

Iz Državne regulatorne agencije za radijacijsku i nuklearnu sigurnost BiH Feni je rečeno da dosadašnja mjerenja s bh. strane, na tački najbližoj lokaciji na Trgovskoj gori, nisu pokazala povišenu radioaktivnost u odnosu na prirodnu, ali i da potencijalna opasnost ne može biti isključena kad se odlaže materijal ove vrste.

izvor: klix.ba